

EDICION SPECIAL HIMNO Y BANDERA

Homenahe na honor di Hilario "Lala" Angela (q.e.p.d)

ORANJESTAD (AAN)- Mañan Diadomingo 17 di Maart, Colegio Hilario Angela lo tene un bazaar y celebra su di 20 aña di existencia. Den cuadro di esaki tambe e school lo rindi homenage na e persona di cual e school ta carga su nomber Sr. Hilario "Lala" Angela (q.e.p.d). E programa ta prepara pa sali 3'or di atardi for di school cu un desfile di auto y scout y pa bay na e cas Weg Rooi Hundo 65. Na e cas e school lo duna un cariño na e casa y despues e caravana ta bay pasa den bario y regresa e school. Pa 4'or di atardi lo tin un

celebracion na school caminda lo tin show di autonan clasico y tambe ride pa e muchanan.

Historia di Sr. Hilario "Lala" Angela.

Hilario a nace dia 7 di November 1927 y a fayece dia 12 April 1992. E ta bin for di famia Maduro y Angela, di parti su mama (famia Angela) nan ta 2 ruman y for di su tata (famia Maduro) nan ta hopi ruman. Pero e no a lanta cu su tata na cas y tampoco tabata tin un relacion cu ne. Ta pesey for di hoben cu un caracter fuerte pero cu un bon curazon el a wordo considera como e cabez di cas. For di

su hubentud el a sa di participa den deportenan manera futbol, baseball, golf y otro deportenan hunto cu su amigonan. Na aña 1944 di un hoben humilde a cuminsa traha cu su 17 aña pa hiba su famia padilanti na refineria lago y a labora 24 aña eyan. Na aña 1950 a casa cu Sra. Luisita Angela-Vrolijk di cual for di e pareha aki a nace 6 yiu, e mayor Armando "Juni", Benjamin "Toy" (q.e.p.d.), Rudolf "Cutty" y despues a bin marcela "cela", Ingrid "Gichi" y e ultimo Esther. pero e no a para keto den e refineria caminda el a sa di yuda su mes tumando



diferente curso pa por a prepara su mes hopi bon pa futuro y sin ripara e tabata tin un ambicion y amor pa hiba su pais padilanti via politica.

El a lanta su mesun negoshi na 1969 y a subi lista como candidato di partido AVP pa 1 aña. Na 1971 tabata un co-fundador y candidato di partido MEP hunto cu Sr. Gilberto F. "Betico" Croes. Como un miembro den Parlamento Sr. Angela a duna su aporte y ideanan na diferente proyecto na bienestar di Aruba, por ehempel nos Himno y Bandera, Escudo, Status Aparté, nos cultura, folklore y cria y pesca, clinica San Nicolas. Tambe den transcurso di añanan e tabata miembro di Eilandsraad, miembro di Parlamento, director di Hulp Bestuurskantoor San Nicolas, miembro di comisionnan di Gobierno pa duna e cayanan y lugarnan di Aruba un nomber, a contribui cu nos studiantenan incansablemente panan por a sigui nan estudio den exterior pasobra antes no tabata tin beca pa nos studiantenan. El a wordo condecora pa Reina Beatrix como Ridder van Oranje Nassau. Como politico e tabata un homber cu un caracter hopi fuerte y skerpi, no solamente pa

su contrincantenan di otro partidonan pero tambe den su propio partido. Loke por a nota di Sr. Angela ta cu aunke e tabata tin diferencia cu otro, na final tur tabata su amigonan. Su hobbynan tabata nos cultura, folklore, musica, baile, futbol, golf, domino y baseball y sin lubida su bestianan na cas cu e tabata tin manera carne, porco, cabrito, calacuna, pato, galina y su cacho stima Zwartje cu un biaha su mes a opera e cacho pa por a biba un tiki aña mas. Su amor, contribucion y cooperacion di semper pa e school aki a pone Gobierno di Aruba duna e school e nomber di Colegio Hilario Angela na aña 1992 (antes Princes Wilhelmina School).

Un mensahe semper di Sr. Hilario Angela tabata pa tur su nietonan, estudiante di e school aki y tur muchanan di Aruba haya un bon educacion y pa nunca lubida di stima Aruba. Y den e cuadro aki como un baluarte cu a contribui grandemente den e desarojo di nos dushi Aruba, pueblo di Aruba engeneral y di e bario en particular ta keda invita pa tur hunto rindi honor pa ta presente sea na school of na e cas. Un y tur ta bonbini.